

**MEMORANDUM O RAZUMIJEVANJU I SARADNJI U OBLASTI
ZAŠTITE I SPAŠAVANJA**

Sarajevo, novembar, 2014.

MEMORANDUM

O RAZUMIJEVANJU I SARADNJI U OBLASTI ZAŠTITE I SPAŠAVANJA

Između

Ministarstva sigurnosti Bosne i Hercegovine, sa sjedištem u Zgradi prijateljstva između Grčke i Bosne i Hercegovine, Ulica Trg BiH broj 1 u Sarajevu

i

Udruženja „Specijalni spasilački tim, Bosna i Hercegovina, sa sjedištem u Ulici Safvet bega Bašagića broj 12 u Sarajevu

U daljem tekstu: Ugovorne strane

OPĆE NAPOMENE

Imajući u vidu visok stepen rizika i ugroženosti Bosne i Hercegovine od prirodnih ili drugih nesreća i mogućih teških posljedica po živote i imovinu ljudi, Ministarstvo sigurnosti Bosne i Hercegovine i Specijalni spasilački tim kao nevladina organizacija koja okuplja stručne, specijalno obučene ljude, različitih specijalnosti značajne za oblast zaštite i spašavanja, utvrdili su značaj međusobne saradnje u ovoj oblasti kroz zajedničke aktivnosti u cilju unapređenja sigurnosti građana Bosne i Hercegovine.

Ciljevi i aktivnosti Specijalnog spasilačkog tima su: učešće u potragama za nestalim osobama kao i vađenje nastradalih i različitih predmeta i materijalnih sredstava iz pećina, jama, bunara, izvlačenje iz snježnih nanosa i lavina, potraga za nestalim i unesrećenim na planinskim terenima koji uključuju penjanje i spuštanje na većim visinama, spašavanje iz ruševina i drugih nepristupačnih terena, pružanje stručne i tehničke pomoći u uspostavi veza i komunikacija za potrebe potrage i spašavanja u teško dostupnim područjima, rad na okupljanju građana radi pružanja pomoći u akcijama traganja i spašavanja u slučaju prirodnih ili drugih nesreća, poticanje i zalaganje u uspostavi signalizacije i putokaza na stazama izvan redovnih ruta, saradnja sa istim ili sličnim udruženjima, asocijacijama, službama spašavanja, institucijama vlasti, pravnim licima u zemlji i inozemstvu, organiziranje tribina, okruglih stolova, simpozijuma i savjetovanja te izdavanje stručnih publikacija u svrhu informiranja o aktivnostima Društva i upoznavanja sa značajnim informacijama u oblasti zaštite i spašavanja. Djelatnost Udruženja se realizira u skladu sa Okvirnim zakonom o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini („Službeni glasnik BiH“, broj 50/08), Zakona o udruženjima i fondacijama Bosne i Hercegovine („Službeni glasnik BiH“, br. 32/01, 42/03, 63/08 i 76/11) i drugim obavezujućim pravnim aktima u oblasti zaštite i spašavanja. To se odnosi na zakonske obaveze i međunarodne obaveze i strategijski opredijeljene pravce Bosne i Hercegovine za članstvo u vodećim evroatlanskim i drugim regionalnim organizacijama.

Potpisivanje Sporazum o saradnji između Vijeća ministara BiH i nevladinog sektora 2007. godine koji potvrđuje njihovu opredijeljenost da ojačaju svoje obaveze i odgovornosti kroz međusobnu saradnju ide u prilog potpisivanju predmetnog Memoranduma.

Sporazum predstavlja polaznu tačku za razvoj partnerstva a počiva na zajedničkim vrijednostima i uzajamnom poštovanju, te je nastao kao izraz potrebe da se izgrade institucionalni okviri međusobne saradnje.

Opravdanost potpisivanja Memoranduma nalazimo i u Strateškom planu Ministarstva sigurnosti 2013-2015. godine u kojem je predviđena uspostava formalne saradnje sa nevladinim sektorom u Bosni i Hercegovini.

Uvažavajući mogućnost unapređenja sistema zaštite i spašavanja, Ministarstvo sigurnosti Bosne i Hercegovine je opredijeljeno da kroz saradnju sa nevladinom organizacijom, odnosno udruženjem „Specijalni spasilački tim“, pored ostalog, doprinese ispunjavanju zakonskih i međunarodnih obaveza u oblasti zaštite i spašavanja kao i bržem napredovanju Bosne i Hercegovine u članstvo NATO-a i Evropske unije.

Ministarstvo sigurnosti Bosne i Hercegovine i udruženje „Specijalni spasilački tim“ izražavaju spremnost da u skladu sa svojom misijom i zakonski utvrđenim nadležnostima, a putem zajedničkih aktivnosti izgrađuju i razvijaju sistem zaštite i spašavanja u oblastima djelovanja Ministarstva sigurnosti Bosne i Hercegovine, a koje su predmet rada Udruženja. Memorandum predstavlja polaznu osnovu za razvoj partnerstva zasnovanog na ravnopravnosti i uzajamnom poštovanju, nastao kao izraz potrebe da se utvrde okviri i vidovi buduće saradnje u oblasti zaštite i spašavanja.

MODALITETI SARADNJE

(1) Predmet saradnje po ovom memorandumu podrazumijeva slijedeće modalitete:

- a) saradnja u razvoju metoda prevencije, procjenjivanja i analiziranja rizika od prirodnih ili drugih nesreća;
- b) saradnja u aktivnostima pružanja pomoći u traganju i spašavanju ljudi i materijalnih dobara;
- c) uzajamna saradnja kroz organizaciju i učešće u obukama, seminarima, radionicama, vježbama i drugim specijalističkim modulima obučavanja;
- d) pomoć i obostrana saradnja u unapređenju pripravnosti za prirodne ili druge nesreće i planiranju kapaciteta za odgovor na eskalaciju rizika i nastanak nesreća;
- e) saradnja u programima obučavanja i osposobljavanja zaposlenih u organizacijskim

jedinicama u sastavu Ministarstva sigurnosti Bosne i Hercegovine i svih ostalih aktera u sistemu zaštite i spašavanja;

f) uzajamna saradnja i podrška u izradi, Okvirnim zakonom o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini, utvrđenih planskih i organizacijskih dokumenata u oblasti zaštite i spašavanja;

g) zajednički nastup u pripremi i realiziranju projekata u procesu približavanja Bosne i Hercegovine Evropskoj uniji;

h) uzajamna saradnja u organiziraju i radu domaćih i inozemnih strukovnih asocijacija, udruženja i tehničkih komiteta direktno ili indirektno vezanih za oblast zaštite i spašavanja.

(2) Memorandumom mogu biti razvijeni i drugi oblici saradnje u oblasti zaštite i spašavanja iz nadležnosti Ministarstva sigurnosti Bosne i Hercegovine i udruženja „Specijalni spasilački tim“ utvrđeni Okvirnim zakonom o zaštiti i spašavanju kao i Zakonom o ministarstvima i drugim organima uprave Bosne i Hercegovine i Zakonom o udruženjima i fondacijama kao i drugim propisima i dokumentima, te propisima i dokumentima kojima se reguliraju nadležnosti i djelokrug rada Udruženja.

(3) Trajanje Memoranduma nije vremenski ograničeno i evaluira se godišnjom procjenom rezultata projekata koji su predmetom ovog memoranduma, a koju će izvršiti Ugovorne strane.

NADZOR NAD PROVEDBOM MEMORANDUMA

(1) S ciljem osiguranja provedbe dogovorenih aktivnosti, Ugovorne strane formiraju zajednički tim koji vrši redovan nadzor i evaluaciju rezultata saradnje.

(2) Ugovorne strane će održavati sastanke najmanje dva puta godišnje, a po potrebi i češće.

RELEVANTNI ZAHTJEVI UGOVORNIH STRANA

(1) Udruženje „Specijalni spasilački tim“ iskazuje spremnost da u skladu sa svojim mogućnostima i kapacitetima intenzivno radi na ostvarivanju ciljeva predmetnog memoranduma, te izražava nadu da će, u slučaju potrebe, dobiti podršku Ministarstva sigurnosti Bosne i Hercegovine prilikom iniciranja projekata koji će biti usmjereni na izgradnju sigurnijeg okruženja u Bosni i Hercegovini i ispunjavanju strateških ciljeva Ministarstva.


- (2) Ministarstvo sigurnosti Bosne i Hercegovine saglasno je i spremno da, shodno zakonima utvrđenim nadležnostima i planiranim sredstvima za realizaciju projekata, sa udruženjem „Specijalni spasilački tim“ dogovara i ugovara zajedničke aktivnosti iz Memoranduma u svrhu efektivne i efikasne realizacije sistemskih zadataka u izgradnji i razvoju kapaciteta Bosne i Hercegovine za sigurnost i zaštitu građana.
- (3) Vidovi i oblici podrške, te planirani obim saradnju definirat će se kroz posebne dokumente na osnovu inicijative neke od ugovornih strana.

ZAVRŠNE ODREDBE

- (1) Memorandum je neograničenog trajanja, ali može prestati važiti na zahtjev Ugovornih strana, na osnovu najave, najmanje mjesec dana prije otkazivanja, uz detaljno obrazloženje razloga takve odluke.
- (2) Ovaj memorandum potpisan je u 2 (dva) istovjetna primjerka, na službenim jezicima u Bosni i Hercegovini (na dva pisma), gdje svaka ugovorna strana zadržava po jedan primjerak.
- (3) Memorandum stupa na snagu danom potpisivanja.

Potpisano u Sarajevu, 04.11.2014.godine

Za Ministarstvo sigurnosti
Bosne i Hercegovine


Mladen Čavar, zamjenik ministra



Za Specijalni spasilački tim


Muhamed Švrakić

**SPECIJALNI
SPASILAČKI TIM**